

San Frichosu (TINÉU)  
 EL CARNEIRU ATERECÍU +  
 UNA LLIMIAGADA MAL CUCINADA  
 María Álvarez, 84 anos.

13

Grabación feita por Jesús Suárez López nel 2002.  
 La entrevista desarróllase nun asiento de madera na calle.

**D**ecían que taba una vez uno... iba a echa'l augua ya topóu un carneiru medio aterecíu, dixu él:  
 – Coño, ¡lévulo pa casa.  
 Llévóu pa casa... ya meixóu pur él cuando iba pa casa. Ya llegóu pa casa... como antes había muitas pulgas aquí pulus pueblos... el carneiru pousóu nu llar allí todo encuía ya foi la muyer ya desvestíuse pa mirar las pulgas... ya n'estu'l carneiru espabilóu ya dixu él:  
 – ¡Uh, ju, jui, vi las tetas a la tu muyer!  
 Ya féixose diablo ya escapóu, pero un carneiru, sí, contaban. Nun sei, pezme mui gorda, parezme mui gorda pa que fose verdá.

Ya outro d'eiquí del llugar tamién contaban... el buelo d'este mozo que vei ahí arregando... que iba pa un prau a echar l'augua ya topóu el diablo revolviendo n'una payella, ya que dixera el diablo:  
 – La mi llimiagada, mal cucinada, ¿quies d'ella, Rayón?  
 Ya que con un tochu que-y daba d'aquellu qu'asaba, que eran llimias, que son unos bichos babosos, negros, mui feos.

